

潛江甘鵬雲纂述

潛江學人考

潛江澤國歲苦水患則謀生難自前清雍乾以來雋南宮者寥落如晨星則科名難既苦生計又鮮科名兼憚遠遊遂無奔走仕途者則仕宦難雖然科名仕宦難則難矣未若學人之難也以予考之明清兩代已逾五百年章縫如鯽子衿如林館師之所講授學子之所服習大都科舉之業耳求其抗希古人講求實學者固屈指可數也在明正嘉間爲正心誠意之學者僅初杲初旦昆仲劉勳劉垓父子而袁國臣繼之杲在南雍從魯文恪講學旦則以呂涇

潛江舊聞五

一

崇雅堂叢書

野爲師勳私淑陽明晚年與劉陽講學復眞書院垓自督學雲南歸建同仁書院與邑子講學其講友則鄒元標劉元卿也國臣講湛甘泉之學曾大書隨處體認天理六字刻石學宮卽其講學宗旨所在也萬厯間有劉應珂朱孔昭莫汝嘉歐陽東鳳何薦可朱宗望諸人應珂守太平關青山書院與邑士講朱子之學鄒忠介公盛稱其爲人孔昭早歲湛思經史講求天官輿地兵謀形勢政治之學著有太平畧十卷晚年與高景逸顧涇陽講學東林著有聖學正脈又有默石子劄記專求一己歸宿所在多所自得汝嘉講實踐躬行之學不欲以書傳東鳳守常州修復東林書院高顧講學東林實發軔於此又建傳是堂取斯堂

與多士講學陳鼎東林列傳敘之特詳初爲刑部郎究心法律之學著有闡律十卷

明史藝文志  
著錄一卷

又精詞章之學著

有飛霞閣社草素風居士集晚年歸田閉門讀易著有我乾篇薦可治經精二戴禮著有二戴訂注宗望在南雍究心詞章之學陶石簣郭明龍汪冀夔李本甯雅推重之著有鈎珩集天崇間有柴一德朱之瑚張承宇劉若金莫若智劉率國諸人一德博覽羣書遊名山大川友天下名士著作甚富惜遭兵燹散亡盡矣之瑚講宋儒之學以躬行爲主縣志稱其生平以聖賢自律言動不苟歷任公安南康學官提躬範士咸以人師目之迄於白首進修不懈非空談理學者比也承宇篤好經史詞章之學而於春秋三

潛江舊聞五

二

崇雅堂叢書

傳尤所究心有三傳合鈔二十一史釀爲詩古文詞下筆輒數千言至有名著有牆東樓集若金累官刑部尙書海桑之變歸隱潛陽坐臥一小樓足不下樓者三十年景陵吳驥贈詩所謂留得黃冠依故里占來白社託先民者也精研岐軒之學著有本草述三十二卷若智爲焦澹園門下士讀書不事章句惟究心輿地邊防屯田河漕政治經濟有用之學惜其書不傳耳率國喜讀人間未見書而所爲詞章戛戛獨造不肯傍人牆壁蓋所謂師心自得者著有夢予遺稿有清順康間有劉肇國歐陽烝莫與先劉廣國向大觀朱士尊方來段陟雲朱載震王昫諸人肇國烝均博通經史百家之學以工詩古文詞名肇國著有茭湄

集烝著有舜問堂遺稿與先亦以文學名縣志稱其所爲  
詩歌古文詞必已出奧博之聲誦服徧宇內非虛語也著  
有南陂詩鈔郇笈讀史樂府今是堂集廣國窮極六經子  
史博稽天官輿地律歷象緯諸書張京江相國推爲一時  
偉儒著有後樂堂集大觀早歲沈酣六籍而周易詩禮致  
力尤深著有周易體象禮記續朱詩經古序解兼治史鑑  
百家之學有史論楚詞解漢魏樂府題解金剛經相解西  
村詩說而經世之學尤所措意談鄉邦利弊表裏洞澈可  
以見諸施行所著圃譚問答卽其緒論也詩古文詞亦工  
著有邁舫集望湄集士尊之學以明體達用爲務凡經世  
大典如杜鄭馬邱諸家所紀而未備者蔑不窮其端委究

潛江舊聞五

三

崇雅堂叢書

其本末不愧致用之學著有治平要錄五卷史畧八卷遇  
鈔十卷詩古文詞亦足頡頏古人著有編柳堂集宋牧仲  
序而傳之來於甲乙四部均有論撰甲部有三經筆記乙  
部有二十一史補刪諸子有叢書論文則有權言自著詩  
文曰花悟堂集漁洋山人爲之序亦一時績學之士也陟  
雲以布衣稱詩鄉曲時人無知者自孫豹人採風至潛見  
其詩深許其得風人之旨贈以詩有樂府古詩何奇崛讀  
罷爲爾聲暗吞之句人始知其工詩王黃湄見其屯營隄  
歎激賞之以爲寫人民困苦流離之狀不愧詩史朱文端  
尤賞其沈災紀事詩以爲哀情苦狀爲鄭俠流民圖所不  
反爲之刻梓以傳著有天門丈人詩集載震詩學至深遠

有師法湖北通志稱潛江自劉阮仙莫大岸後文學無過載震者不虛也其詩初刻曰和山堂集蘄州顧黃公處士序之後刻曰東浦詩鈔漁洋竹垞及金會公序之最講敦本崇實之學著有下學淺言朱文端爲之序乾嘉以來可稱述者僅有歐陽沂甯熙朝二人沂爲學以治心爲先造次必於儒者嘗作自強錄以厲志講學之尙躬行者也熙朝喜稱詩詩格不必高而性命以之倡立詩社與一時學子互相倡和提倡風雅幾成爲一鄉風氣亦功之不可沒者著有柑堂詩鈔庚辰游草柑堂詩話碧湘齋文集統上所述前後五百年吾潛學人之可稱道者纔二十七人耳其難如此就中以詞章之學爲最多而功力較深可列

#### 潛江舊聞五

#### 四

崇雅堂叢書

於古之作者而無愧者特芟湄大岸石戶天門東浦數人耳次以義理之學爲最多而六經史鑑經世有用之學爲之者較少不過五六人至若醫學爲之者僅蠡園一人則尤少矣大率潛之學人在明以正嘉隆萬啓禎六朝爲盛在清以順康兩朝爲盛成弘以前風氣質朴紀載闕如無可稱者雍乾以後競趨舉業治根柢之學者寥寥無幾人此亦吾邑學風盛衰升降之可考者也光宣以來廢科舉設學堂舉國學子又羣趨學堂果能於科學精益求精以輔儒學所不及未嘗不可致用無如徒視科學爲敲門磚冀達其干進梯榮之目的亦不過與往日科舉等耳人才烏得而盛學術烏得而興也乎

潛人師友淵源

潛俗淳實不事表襮所有著述又皆放軼不傳故邑中先輩雖有學行可稱而知者絕少語云不知其人視其友考其師友淵源則其學可知其人亦可知矣是亦微顯闡幽之一助也如初大參杲以竟陵魯文恪爲師以呂涇野童內方爲友魯氏稱之曰昌言顯彰不愧言官呂氏稱之則曰初公孝友人也童氏以爲名賢取善必有所徵殆有以窺其微矣杲弟大竹旦則及涇野之門講求窮理實踐之學故其學遠有師法又請魯文恪爲之字說以自策勵其出宰也又請童內方告以臨民宰物之方其親師取友之誠豈可及耶劉北華勲私淑王文成講求致良知之學海

潛江舊聞五

五

崇雅堂叢書

內稱同志者必曰北華先生安成鄒守益劉陽其講友也勳子督學垓旣濡染家學又與鄒元標劉元卿爲友以學相勸故其學粹然一出於正自滇歸惟以明道爲事而其講學大旨惟以求仁爲歸觀其闢書院集同志講學顏曰同仁卽可知其宗旨所在矣袁大參國臣則服膺湛甘泉之學郭太守之幹以學行重於時歷州郡有惠政居鄉鄉人化其德頌其義其所友者則郭公正域其所師事者則吳公時來顏公鯨胡公直也柴職方恪以郭少岡黃門余幼峯趙定宇兩司成爲師而友張澤癯太史孫震南參知任心原侍御相與講求經世有用之學故其宰無錫以實心行實政有古循良風履任五載大吏交荐孫柏潭少宰

謂公折圭縮綬無以異人至行古之道則指不一再屈可以想見其爲人矣恪子知縣一真持身清介有內行與江夏黃正色爲友其卒也正色誌其墓一真弟文學一德博極羣書與曹能始李太虛爲莫逆交所學亦與相近著作甚富蓋吾邑博聞君子也朱江安宗望初受知於陳霽巖金子魯兩學使而師海剛峯李霖寰與陶石簣郭明龍李本甯爲友皆人望也其吏績亦嘖嘖人口江安人士爲立去思碑劉太守應珂究心紫陽之學刻有朱子語錄與吉水鄒元標爲講學友元標亟稱其行誼所謂粹乎穆乎如金未鑿如玉未鑿者也歐陽太僕東鳳生平服膺宋儒雖一行作吏不廢講學其守常州則與願憲成允成高攀龍

潛江舊聞五

六

崇雅堂叢書

錢一本薛敷教爲友默石子朱處士孔昭亦與高顧講學東林與歐陽常州爲友晚歲悟危言之難自號默石子有默石子劄記專記其學之所得而深咎逐流忘源之非高忠憲爲之序而傳之劉通政道隆則與高邑趙南星德清葛寅亮爲友以聖賢相砥礪不徒稱莫逆而已趙葛之起用道隆之所荐也莫楚江若智究心世務不遠數千里走秣陵問學焦澹園之門而歐陽康州東白則抗顏爲師講論道義娓娓不勸以故英偉之士時出其門焉如熊經畧廷弼賀尙書逢聖皆其弟子也其卒也賀公銘其墓熊公表其阡皆道其誠正之學孝友之行追憶三十年之德教不可忘則流風所被遠矣劉學士肇國與胡石莊陳百史

莫大岸爲友精鑒別能知人故其門下士賢才特多如熊學士伯龍以文學顯梁提督化鳳以勛業著稽留山永仁以節義見稱於世皆殊絕人物也歐陽別駕壻喜談詩社集秦淮則與孫子雙周伯孔陶仲調杜于皇王子雲劉阮仙爲友唱和無虛日而沈朗倩宋比玉方密之汪遺民尤稱莫逆交皆海內名士也朱石泉載震夙以能詩聞初師黃湄再師漁洋而詩益昌其所友者則趙秋谷查夏重汪武曹湯西崖王孟穀梅耦長王秋史諸人而宋牧仲朱竹垞吳天章尤稱莫逆皆文章宗匠也段天門處士陟雲泉石膏肅幽人貞吉而王黃湄朱高安友之劉處士淩俊初以悔人爲師後又師朱文端文端雅推重之文端入相以詩招之謝不往也王觀錄孝廉最講求身心性命之學亦以文端爲師甯雙梧孝廉熙朝在嘉道間以詩名師錫山顧崧圃錦春而監利王子壽天門劉莘農其友也潛人著述大半淪亡文獻無徵師友淵源多不可考茲但就所知者畧記於此亦可以得其學行之大概矣

潛江初氏袁氏以清廉世其家

潛江多廉吏然以清介世其家者則推初氏袁氏初氏自進忠始洪武中以懷材抱德舉授衛輝推官直公能斷不邇權利數規守不法事守中傷之調福建沙縣知縣卒官僅足具棺殮妻子幾不能歸進忠子灝宣德中以賢良方正舉授清河主簿冰蘖之操初終不渝時人比之孤松傲

雪灝子孝廉珍雖不仕然安貧守道臨財毋苟時有不愧  
孝廉之譽珍子大參杲大竹知縣旦均篤守清白家風故  
所至皆以清惠見稱杲猶子芳令靈璧有善政垂橐而歸  
不名一錢芳子孝廉言至負薪自給真不愧廉吏之後矣  
言子學易爲邠州守有德於邠其致仕也輕車就道歸裝  
惟書數篋耳邠人攀送莫不歎息泣下且相謂曰使君清  
苦乃至於此學易曰吾門素風敢失墜乎邠人祠祀之其  
卒也鄉人私謚爲廉孝先生云袁氏自允行始允行登正  
統丁卯賢書爲鉛山知縣察吏安民清操彌勵九載乞歸  
舟過鄱陽湖運大石壓風濤次九江榷關者見其載重以  
爲皆宦橐也使人啟視惟大石數十片而已無長物也慚

潛江舊聞五

八

崇雅堂叢書

謝而退允行子珣成化丙午舉人爲臨桂知縣以清白承  
家聲世宰沃邑所居茅屋數椽僅蔽風雨珣孫大參國臣  
奉使楚藩卻饋金不受楚王高其介節爲建卻金亭於大  
別山古人道子孫以清白史家傳爲美談若潛江初袁二  
氏真可謂以清白世其家者矣

潛人多以清廉聞

潛江在明初風俗淳樸士人皆知重名節厲廉恥故入仕  
途者皆以清廉聞不僅初袁二氏也李按察宗信初守保  
甯清介之操上徹天聽會銓司大計上出特旨曰朕知李  
宗信廉能不在考列嚴侍御賓令南城清介自守人莫敢  
犯居官布衣蔬食每餐祇具一腐南城人有嚴豆腐之稱



擢南京廣西道御史以抗疏忤旨左遷盱眙知縣調太平卒官俸餘不能具殮葬歐陽東白令宜山民戴如天政廉若洗司理連公得其治狀貽以聯語有四年清白有天知之句遷守德慶州清搽彌厲引疾乞休橐中無鬱林片石彭鳳翀歷守廣東肇慶雲南句尋致仕歸囊橐蕭然不能備資斧歐陽燿牧乾州初下車攜孫瑛誓於眾曰有不潔己自愛以一錢累乾民者殃及此孫劉增令德興有積逋五百大府追之急興人羣哭曰令君廉吏也能任此耶代償之潛人以清廉著聲者不僅此此但畧舉數人以見其概而已明清兩代潛人從無以貪墨敗者蓋苟賤不廉之行君子恥之鄉里笑之承學之士既濡染先輩流風又恐

潛江舊聞五

九

崇雅堂叢書

內疚神明外慚清議故黷貨之事輒引爲深恥而不肯爲

潛江袁氏譜

潛江袁氏譜袁大參國臣所纂而新都汪道昆氏序之其書今亡欲求其義例不可得然汪序頗紀其世次及其書法可以考見其義例今畧載於此袁使君爲家譜壹秉舊章務在傳信尊德清公爲別祖至安斌安珍分東西兩枝自別祖至使君凡十一世東西支分上下卷各先以總圖重本始也繼以各圖明親疏也繼以世次序長幼也其宗法則秉周禮其世次則仿歐蘇顧歐譜不書生没今不一書蓋原始要終人道竭矣有夫婦而後有父子梱內不書一何畧也姓氏生歿今不一書蓋偕老之義存焉繼室則

附之後改適者削無書妾有子則旁書之無子則否丈夫  
無子則書止無子而天則書殤有子而天則書早逝蓋寓  
臧否於筆削較若懸衡楚書於是乎有袁氏譜矣太函集卷二十

六

### 潛江讀書舊家

潛江讀書舊家以明代爲最盛洪武以後則初氏自忠進始正

統以後則袁氏自允行始正德以後則李氏自鑾始嘉靖以後則

安成劉氏自勳始郭氏自世朝始歐陽氏自柏始隆慶以後則莫氏

自汝始荷湖劉氏自應同始萬曆以後則朱氏自宗望始密湖劉氏自道

隆始其世澤之久長者迄於清代順康以來或相承而未絕

乾嘉以後則推城中萬氏而爲之先河者則月峯先生也

### 潛江舊聞五

十

崇雅堂叢書

憶幼時侍坐先公述先生行誼甚詳謂先生立身直方寡

交遊終日端坐如塑教子弟嚴而有法於童幼尤爲盡心

嘗謂人之成敗關乎蒙養不徒課文藝獵科名而已必先

使知作人之道自立之方不可以弱小而忽之也識者以

爲名言邑宰唐園陳公煥世循吏也雅重先生爲人時時

徒步訪之但談學問不及他事久之歎曰此今之澹臺子

羽也或接見士子必曰汝往謁見萬先生乎親其道範圍

其警效可以消人鄙吝之心邑中有老成典刑不可覲面

失之其推崇如此因述潛江舊家憶及先公之言故追記

之以見讀書種子之說確有可信非偶然也先生名錕字

劍光月峯其別號

頃閱錫山顧崧圃錦春菰蘆吟有贈萬劍光詩云劍光先

生七十五落落喬松瘦而古與我測交今七年兩意融如水投乳先生之誼我所佩先生之概我能數不喜韓彥道呼盧任麤鹵不悅高季式括飲恣轟聚不聽淫蠅歌不觀沐猴舞不學耆閣之佛瀛洲仙不作秦陽之農邯鄲賈世人逐臭如蒼蠅先生身不接錢虜世人吸餌若陽鱈先生足不踉公府閉門課兒孫書聲澈屋宇五經註三傳疏韓歐文幾編遷固史兩部卷卷加丹鉛字字勘魚魯有時藻思撐胸腸灑灑千言一傾吐詞瀾尙抵滄溟翻筆勢猶同黃鵠舉所惜鬱湮名不伸歲歲槐黃負辛苦至今頭鬢絲飄蕭一沐朝廷恩始甫劍光溺苦於學累試不售至丁卯始以年老恩賜副榜先生

潛江舊聞五

十一

崇雅堂叢書

見我輒低面自恥微名非自取我初亦爲先生傷今則幡然轉一語君不見唐朝才士羅江東金榜一生名厄沮又不見方干之輩十三人身後登科竟何補可喜而今矍鑠翁居然人健猶如虎此詩寫先生生平摹繪畢肖不啻頰上三毫可以知先生之爲人矣

潛江二藏書家

潛江在明代有二藏書家一歐陽氏大業樓一柏台朱氏擁萬閣大業樓茂野給事柏所建儲書甚富惜身後寢就散亡并樓亦燬矣擁萬閣則創自涓瞻比部宗望其子止園文學之珮繼之經史百家儲藏賅備傳至石戶悔人父子遂得以恣其涉獵爲時聞人藏而能讀識者遑之自悔

人卽世繼起無人加以陽侯肆虐藏籍遂不可問矣書旣無存又無目錄流傳以故人無知者

### 崇禎末潛江六忠節

明崇禎十六年闖賊破承天長驅陷潛江爾時潛人以罵賊不屈死者凡五人曰朱士完曰歐陽燧曰楊自騰曰柴孕參曰劉諒國士完字符禹崇禎丙子舉人揭榜之夕夢黑幟墮其墓門粉書亂世忠臣四字及賊至被執知爲孝廉欲官之完不屈械送襄陽闖營道經泗港嚙指洒血題其壁曰柏台朱舉人死處遂自經賊所過焚燬村里爲墟惟完題壁歸然獨存見明史盧學古傳燧字見日號岫嶼崇禎中爲盱眙令廉明有聲致仕歸盱眙之民立祠祀之迨癸未

### 潛江舊聞五

十二

崇雅堂叢書

賊陷潛燧被執欲降之燧曰我大明臣子豈肯俯首汝賊求生耶與妻廖氏同日殉節見一統志及勝朝諸臣殉節錄自騰字孟昇

以儒生工騎射癸未六月賊將陳良保同僞令趙國珍率兵巡潛自騰率鄉勇迎戰於京山之喬旺口以深入無援被執箕踞罵賊賊支解之見康熙潛江志同時柴孕參亦募鄉勇

拒賊不勝被執使降參曰爲首起義者我也肯覘然從賊乎遂遇害見湖北通志賊旣陷潛城劉諒國奉母蔣避亂湖濱

游騎突至蔣氏投水死諒國悲憤罵賊賊怒亂刃之至死罵不絕見光緒潛江志自闖逆搆亂衣冠士族汗僞職者相望守

土官吏或望風稽顙乞憐馬首冀幸苟全夫孰敢攬其鋒者潛蕞爾邑乃有若而人見危授命視死如歸豈徒一邑

之光閭里之榮而已蓋天地正氣所繫也彼臨難苟免者  
獨何心哉其先一年有死於左良玉手者一人曰游鵝潛  
南鄉人也生有至性聞良玉爲賊所敗縱兵大掠甚憤及  
良玉至潛鵝被執抗言曰將軍簪纓世族朝廷倚若長城  
不戮力勤王殄滅逆賊乃長寇流毒殘及赤子將軍何面  
目見先帝乎良玉大怒縛鵝并其子文琪殺之見康熙  
潛江志此  
崇禎十五年事是年良玉駐兵朱仙鎮爲闖賊所敗驅襄  
陽一郡人以實軍闖賊乘勝攻良玉良玉不能敵宵遁從  
楚王乞二十萬人餉不應良玉縱兵大掠士民死者無算  
自十月二十四日抵武昌至十六年正月中兵始去居人  
登蛇山以望叫呼更生曰左兵過矣良玉旣東闖賊遂陷

潛江舊聞五

十三

崇雅堂叢書

承天旁掠諸州縣

明史左  
良玉傳

然則長寇流毒殘及赤子自是

良玉罪案後代史官不過據實論定而已而游鵝以一鄉  
里細民不畏刀鋸斧鉞之誅面數其罪則尤難也此六君  
子者僅朱士完見於明史忠義傳其餘五人明史均不載  
世人無知者予故表而出之

潛江二閨秀

潛江二閨秀一爲王生柏室張氏邑高士張承宇之姊幼  
慧工詩有所作輒焚之不以示人謂非婦女所宜也常有  
句云懶將脂粉同兒女恨不鬚眉學聖賢其識解之超志  
趣之正恐非近世文人所及又讀詩絕句云病廢機絲老  
廢蠶牙籤緜帙性偏耽唐詩漢賦都收捲日向明窗誦二

南不讀唐詩漢賦而讀二南則其胸次可想此詩沈歸愚  
選入國朝詩別裁集以爲葉辭藻而重修齊閨中知本之  
學蓋篤論也著有閨中雜咏二卷一爲朱萬榕室劉之琪  
號竟凡生而識字能記前生事八歲卽能詩任筆所之遇  
境成詠不必絺章繪句而自然中節又善爲功令文而論  
文尤精此更非尋常女子所能矣其子邦彥嘗赴郢應學  
使者試屬熟讀老泉管仲論且示以詩曰三歸奇蹟有高  
臺仲父當年實霸才諸葛隆中曾自比老泉論裏莫相猜  
輕浮骨相原非福腐爛詩文不是才此去郢中歌白雪倚  
閭望汝及時回及入場試題乃管仲儉乎二節邦彥文極  
推許管仲如母指爲初頤園學使所激賞拔第一人皆謂

潛江舊聞五

十四

崇雅堂叢書

竟凡殆有夙根云著有藜閣吟二卷雙清閣詩二卷李少  
邨孝廉前芳爲之序

閨秀余芳瑤縣志漏載

往黃蘊山先生語余潛江閨秀張氏劉之琪二人外尙有  
余芳瑤能詩與劉之琪唱和後嫁江陵陳氏聞有詩集刊  
行未之見也余隨檢康熙潛江縣志漏未及載嗣檢乾隆  
江陵縣志載有余芳瑤湖居四景廻文詩四首並附識語  
云芳瑤本邑陳氏婦潛江舊家女也隨父孝廉天山宦蜀  
題詠最夥後歸陳號三湖詩史與奇女劉之琪唱和有集  
乃知蘊山先生所談信而有徵再檢潛江縣志選舉表順  
治辛卯舉人有余增逵注云任通州學正不云宦蜀亦不

云號天山天山是否增遠疑不能明也但芳瑤之爲潛江  
舊家女則無可疑矣如續修潛江縣志余芳瑤不可遺廻  
文詩四首以琴棋書畫爲韻附錄於此春湖一碧帶林陰  
秘閣間開帙走蟬新笋出籬疎插影古泉流澗冷藏音勻  
勻柳緣垂絲嫩艷艷桃紅著露深鱗躍藻間波上下塵心  
滌處枕囊琴一夏深清枕一風幃窗向書聲水遶籬架擁  
飛花香積案欄遮幽竹翠橫墀嗶嗶蟬聲藏綠密翩翩蝶  
夢入紅迷謝珠荷葉清凝露夜靜間敲一局棋二秋湖滿  
岸野林舒渺渺飛鴻列陣如遁節老松霜染密淡香叢菊  
雨披疎愁眉鎖盡荒山遠曲徑穿來寒谷虛樓倚暮天南  
極杳幽窗淨几暗堆書三冬寒欲售書囊債爛漫梅窗清  
得耳

朱劉二家詩合刻

清初潛江多詩人而劉阮仙朱悔人兩先生爲最者劉著  
有芟湄集彭禹峯學使序之朱著有東浦集漁洋牧仲竹  
垞諸先生序之遺稿散佚不傳道光中劉迪庵學博用賚  
搜索遺草以爲朱劉二家詩選而以悔人之父士尊阮仙  
之叔祖道隆兄弟率國信國廣國暨族人連俊曾孫女竟

凡之詩附之王霞九熊兩溟爲之序芟湄東浦二集已亡  
賴此選本存什一於千百耳

### 潛江縣志

創修潛江縣志者爲明教諭豐城崔崑其書成於弘治壬  
戌紀成化以前事次則明知縣婺源潘之祥任編著者邑  
人歐陽副使柏劉侍御寅李西鄉鳴也成於萬曆庚子凡  
十五卷紀萬曆以前事繼則清知縣郟陽王又旦任編著  
者邑人朱拔貢士尊向懷遠大觀也紀康熙庚戌以前事  
編次未竟郟陽以內擢去書迄無成繼郟陽後而修潛志  
者爲知縣清澗劉煥編著者爲邑人朱石泉載震其書成  
於康熙甲戌凡二十卷紀康熙癸酉以前事崔潘二志佚

### 潛江舊聞五

十六

崇雅堂叢書

不可得見王志久不傳惟京師圖書館尙有鈔本九卷

存二

卷至七卷又  
藝文二卷

殘缺不少完全至今存者獨劉志耳光緒中

知縣陽湖史致謨復爲續志二十卷紀光緒己卯以前事  
初本延劉叔俛恭冕任纂修中道謝去繼之者苦不得人  
未爲善本也自己卯迄遜國之末又閱數十年大有文獻  
無徵之懼則開局重修之舉爲不可緩矣

頃閱沔陽童內方集有答顧東橋論修承天志書稱司徒  
孫公志安陸荆門司成魯公志景陵大參初公志潛江而  
敘亦志沔陽欲求承天之事大抵具矣云云乃知邑人初  
杲亦曾爲潛江志也杲在世宗時以議大禮受廷杖直聲  
動朝右累官至雲南參政所至均有功績惜其書不傳朱



悔人修志時亦祇稱見崔潘二志不云見初志蓋初志亡佚久矣

又閱明朱睦㮮萬卷堂書目收有金皋所纂潛江志四卷其書不知成於何時亦不知金皋何許人也

### 康熙潛江縣志之失

康熙潛江縣志二十卷分十三門一縣紀二天官志三輿地志四建置志五學校志六饗祀志七風土志八賦役志九河防志十秩官志十一選舉志十二人物志十三藝文志爲邑先正朱悔人先生載震所纂文筆頗稱馴雅然其中不無可議先通議公三餘筆記有一條專論此書得失持議甚精雖起朱先生於九原而質之當亦首肯也畧云

### 潛江舊聞五

十七

崇雅堂叢書

凡著書篇名與書名有別如史記百三十篇之子目以紀表書傳世家名而不以記名漢書百篇之子目以紀表志傳名而不以書名避重複也朱志十三門除縣紀外餘如天官輿地之類均以志名則不免與書名重複矣可議者一方志不可無圖地圖尤要如現勢地圖沿革地圖以及水道隄防鄉區村鎮均於一縣政治有關非有精密之圖不可朱志無之但有城池縣署儒學等圖於政治何益可議者二最無理者天官一志也子目二一曰分野一曰災祥楚地爲翼軫之分野楚地大矣非潛江一邑所得專列入縣志何所取義至於災祥乃班志五行之屬非遷史天官之類混稱天官殊非其實可議者三文廟啟聖祠以及

名宦鄉賢二祠既列入學校志矣又列入饗祀志不嫌重複乎可議者四點綴風景如瀟湘八景之類最爲方志陋習朱志所載潛江八景雖云沿襲舊志未免失於別擇列入古蹟究嫌未安可議者五風土一志列風俗物產可矣至若墟墓別墅之類應列古蹟乃並古蹟列入風土豈非實不稱名可議者六忠節傳首明安達爾乃元至正中潛江達魯花赤也雖以禦寇力戰死應列秩官志宦蹟傳鄭文暹後列忠節傳非也可議者七人物志闕漏尤多袁珣初芳初旦廉吏也隗邦衡循吏也亦義士也張懋仁周光祚篤實行崇正學端人也李曉關維甸朱恪舒詩人也而列傳無之何暉祚王海雲張文蔚郭鏞孝子也而孝友傳

無之張邦彥以善畫名而技術傳無之歐陽東暹之女賢女也歐陽焯生母張氏何翰妻方氏賢婦人也而列女傳無之非疏漏而何李之皞傳稱皞篆儒學碑記見金石記然志實無金石記非矛盾而何初言有列傳矣又列孝友傳一人兩傳不幾於疊床架屋乎可議者八藝文志應踵劉班成規專載書目乃沿俗例專載文詞與詩文選本何異可議者九方志網羅文獻應有金石一門潛江設縣雖晚碑刻不少聽其佚亡不加蒐集寧免闕畧之譏可議者十統觀全書惟賦役河防兩志最爲精確雖河防志未闌入康熙以後事乃光緒重刻時爲無識者所羈入非朱志本然也朱先生在康熙間負盛名所著之書大半軼亡存

者獨此志耳後來承學之士固應兢兢保持然偶有失違又豈可隨聲附和故畧加辨正以附諍臣之義非敢指前人之瑕疵也

光緒潛江續志之失

先公三餘筆記又有一條論光緒潛江續志之失畧云邑宰史榦甫明府刻潛江續志成以一部示我粗閱一過令人愀然不樂無義法無體例不待言矣其敘事乃至無倫次其記載乃至無別擇雜亂抄撮不成片段徒取充卷帙而已如學校志之歷代學校表典禮志之禮器圖舞佾圖均自他書抄入於潛江無絲毫關切也而兵防志尤爲冗濫咸同間髮捻之亂潛江當兵衝鄉團之戰死者婦女之

潛江舊聞五

十九

崇雅堂叢書

被兵死者約計四五千人按名列入不幾同點鬼簿乎女貞一志其中頗有不理人口者君子存心忠厚不忍明言也以此推之則採訪之猥濫可知而載筆者之不免曲筆亦可知矣統觀全書雖有二十卷之繁而寒儉特甚舊聞軼事漏載殊多頻年遭水旣苦文獻無徵又無人負網羅之責以故寒儉如此不特寒儉而已蕪雜荒率鄙陋諸弊均所難免蓋總纂初本屬之劉叔俛先生先生經學湛深果出其手當有可觀不料到局日淺去不復回分纂諸公七手八腳罔識著述體裁明府但知好名毫無學識旣無人總其成又急欲成書遂至成此笑柄湖北通志局方徵集各府縣志以備編纂通志材料此志若上之省局豈不

令有識齒冷亟應敦請夙儒重加編纂免至貽笑士林聞  
萬九華先生於史志有所改定未見其稿本不知已成否  
蓋萬先生亦大不滿意於史志也